

Reiseprotokoll Prag 2012

Fünfe vom Bett raus, duscht und gwaschen,
dann scho der Griff zur Reisetaschen,
de wird ins Auto includiert,
weil scho um sechse abgefah'n wird.
Dann Abfahrt via Straubing, Cham,
weil's dort de mehran Pickerl ham.
De Pickerlsuche dauert länger,
dafür dann zu am Parkplatz kemma.
Brotzeit mit Aufschnitt und am Bier,
koid und erfrischend – aber wia!
In Prag um elfe ei'passiert
und glei an Prager Frühling gspürt.
D'Alice erscheint uns beim Hotel
beim Redn und Geh' erstaunlich schnell
und außerdem aa ziemlich laut
- wahrscheinlich Lautsprecher ei'baut?!
Schwarzer Schirm führt uns durch d'Stod,
so lang, bis jeder Hunger hod.
Desweg'n a Kellerlokal gnumma,
im wahrsten Sinne „runterkumma“
- zwoa Stockwerk war's im Boden g'steckt,
trotzdem hods oberirdisch gschmeckt!
Vorspeise war a kloans Problem
- es hod zu wenig Aufschnitt gebn!
Rauskumma aus de Katakomben
- d'Nachspeis steckt no in de Plomben –
dann wieder hinterm Schirm hergrennt
- langsam hob i mi scho dro gwöhnt....
Wia i dann ins Hotel neikumm,
hob i no immer so an Schwung
- in 8. Stock glauffa aufs Zimmer,
aufs Bett gworfa – i kann jetzt nimmer!

Auf d'Nacht – olle san wieder munter –
mia gengan zu der Taurus nunter,
warten auf d'Abfahrt drunt am Kai
- auf oamoi kummt a Nackedei,
der sich scheint's gar net so geniert.
Mei Meinung: Der war includiert.
A tolle Fahrt, a sehr guat's Essen
- desweg'n de Nackerte vergessen
und gsunga auf'm Oberdeck
- des Prag is schee – ja do varreck!

Frühmorgens – mitten in der Nacht –
mia wern ma nauf zum Hradschin bracht
Führung durch Alice – Schirm in weiß -
D'Sonn brennt gscheid runter – ziemlich heiß!
Der Präsident wohnt irgendwo
hob i verstanden – oba wo?
Und wos is sonst ois hängablieb'n?
Olle war'ma im Veitsdom drin,
sehng'ma den Königssaal ganz kurz,
hör'ma vom Prager Fenstersturz.
Do werfas mit Beamte rum
- so quasi a Karrieresprung...

Anschließend dann beim Dom daneb'n
an Schorsch mit Frau ois Standbild gsehng
(der hod sein Drachen, hoäßts, dressiert,
wofür er heilig gsprocha wird).

Aa unser Schorsch wird no a Held
und ois Senator dargestellt.
Hob aa no g'lernt, de Prager wern
katholisch g'macht von Habsburgern
und woäß aa endlich, daß der Pfau
ganz radlos is ohne sei Frau...

D'Alice hod uns no sovui gsogt,
so vui, dass mi des fast derschlogt.
Sie gibt bei jedem flotten Schritte
Infos für Fraun und Männer – bittä!
I merk, dass' mir schee langsam g'langt,
- i bring iatz ois' scho durchanand
und kumm zum Schluß von mei'm Bericht,
bevor i no an Schmarrn z'sammdicht!

Hoit! D'Wallfahrt no – es geht bergan,
900 Meter san net lang...!
Wenn oana fromm is, so wia i,
dann zählt de Streck' für her und hi.....
In Ringelai no Speis und Trank
- ganz schee is' gwen, Mätzner sei Dank!!
Und wenn's moi wieder so weit is,
dann werd i mitfah'n, des is gwiß!!